

NAQQIUT

Inatsisartut inatsisissaatut siunnersuut 19. septembari 2016-imeersoq taarserpaa

(Naqqiutip Inatsisartut inatsisissaatut siunnersuut imigassat aalakoornartut pillugit Inatsisartut allattoqarfiata naqqiutaa malillugu aaqqinneqarpoq Naalakkersuisunut tunniunneqarfissaanik killigititaasoq qaangerlugu tunniunneqarsimasoq naapertorlugu.)

Siunnersuut uunga: : Imigassanik aalakoornartortalinnik nioqquteqartarnek sassaallertarnerlu pillugit Inatsisartut Inatsisaat nr. xx, ulloq xx.xx 2016-imeersoq

Kapitali 1

Inatsimmi pineqartut

§ 1. Inatsimmi pineqarput imigassanik aalakoornartortalinnik nioqquteqartarnerit aamma sassaalliteqartarnerit sulluunniit tamarmik.

Imm. 2. Taamatuttaaq inatsimmi ilanngunneqarput imigassanik aalakoornartortalinnik sassaalliteqarnermut maleruaqqusat, angerlarsimaffinni imigassanik aalakoornartortalinnik imigassaliorneq pillugu maleruaqqusat, imigassanik aalakoornartortalinnik nittarsaassineq pillugu maleruaqqusat, aammattaaq imigassanik aalakoornartortalinnik atuinermi naleqquttumik ileqqoqalernissamut iluaqutaasussanut aalajangersakkat.

Nassuiaatit

§ 2. Inatsimmi matumani "imigassatut aalakoornartortalittut" tassaapput imigassat sulluunniit tamarmik 0,0 volumenprocenti sinnerlugu aalakoornartumik akullit.

Imm. 2. Nioqquteqarnek tassaavoq imigassanik aalakoornartortalinnik atuisartumut nioqquteqarnek, nioqquteqarfiup avataani imerneqartussanik.

Imm. 3. Sassaallerneq tassaavoq imigassanik aalakoornartortalinnik sassaalliteqarnek, sassaalliteqarfimmi imaluunniit taasuma eqqaani imerneqartussanik.

Imm. 4. Pineqartut uku "imigassanut aalakoornartortalinnut akuersissut" imaluunniit "akuersissut" inatsimmi matumani tassaavoq imigassanik aalakoornartortalinnik nioqquteqarsinnaanermut imaluunniit sassaalliteqarsinnaanermut akuersissut.

Imm. 5. Inatsimmi matumani "ataasiaannartumik atuuttussamik akuersissut" tassaavoq ataasiaannartumik aaqqissuussinerup ingerlanneqarnissanut atatillugu imigassanik aalakoornartortalinnik sassaalliteqarnissamut akuersissut.

Kapitali 2

Imigassanik aalakoornartortalinnik nioqquteqarsinnaanermut sassaalliteqarsinnaanermullu akuersissut

§ 3. Imigassanik aalakoornartortalinnik nioqquteqarnissaq imaluunniit sassaalliteqarnissaq inertequtaavoq tak. § 2, imm. 1, imigassanik aalakoornartortalinnik nioqquteqarsinnaanermut sassaalliteqarsinnaanermullu akuersissummik pigisaqartinnani.

Imm. 2. Qinnuteqaateqartoq inuussutissarsiummik ingerlataqarneq pillugu Inatsisartut Inatsisaanni nr. 29, 9. december 2015-imeersumi aalajangersakkanik naammassinnissimassaaq.

Imm. 3. Imm. 1-2-mi piumasaqaatit aammattaaq pisortat suliffeqarfiisa pisiniarfiutaannut, akunnittarfiutaannut, neriniartarfiutaannut, umiarsuaataannut il.il. atuupput, taakku inatsit alla naapertorlugu ilaatinneqartussaanngippata.

Imm. 4. Ataasiaannartumik atuuttussamik akuersissummik tunniussinermi §§ 16-imi aamma 17-imi aalajangersakkat malinneqassapput.

Imm. 5. Imigassanik aalakoornartortalinnik nioqquteqarsinnaanermut sassaalliteqarsinnaanermullu akuersissut kommunimi pineqartumi akuersissuteqartarnermut aalajangiisartunit tunniunneqassaaq. Sumiiffinni kommunit killeqarfiisa avataaniittuni imigassanik aalakoornartortalinnik nioqquteqarsinnaanermut sassaalliteqarsinnaanermullu akuersissut Naalakkersuisunit tunniunneqassaaq.

*Imigassanik aalakoornartortalinnik
nioqquteqarsinnaanermut sassaalliteqarsinnaanermullu inunnut akuersissut*

§ 4. Inuit imigassanik aalakoornartortalinnik nioqquteqarsinnaanermut sassaalliteqarsinnaanermullu akuersissummik tunineqarsinnaasut tassaapput

- 1) 25-nik ukioqalereersimasut, taamaattoq tak. § 12,
- 2) nammineersinnaassusiagaasimassanatik nakkutigineqartussaanaatilluunniit,
- 3) imatut ileqqulersorsimassanngitsuussapput isumaqartoqarsinnaalluni suliffimmik illersorneqarsinnaasumik ingerlatsisinnaanngitsuusut, tamatumunnga ilanngullugu pinerluttulerinermi inatsimmi § 164, imm. 2 tunngavigalugu pillagaasimasuussanngillat,
- 4) sullissinernik tigusaqarsimassanatik imaluunniit pisussaaffinnik imminnut pisussaaffilersimassanatik § 11 tunngavigalugu nioqquteqarsinnaanermut /sassaalliteqarsinnaanermut akuersissummik tunineqarsinnaanermut akornutaasunik,
- 5) pisortanut 50.000 koruuninik amerlanerusunilluunniit akiligassaareersunik akiitsoqassanngillat, kiisalu
- 6) akiliisinnaajunnaarnermik pissutilimmik imaluunniit suliffeqarfiup aaqqissuuteqqinneranik ingerlatsiffigineqassanatik,

Imm. 2. Naalakkersuisut imm. 1, normu 5-imi kisitsisit allassimasut nalunaarut aqputigalugu allannortissinnaavaat.

Imm. 3. Taamatutaaq Naalakkersuisunit akuersissut piumasaqaataavoq imigassanik aalakoornartortalinnik nioqquteqarsinnaanermut sassaalliteqarsinnaanermullu akuersissummik tunniussisoqassappat makkununnga:

- 1) Inunnut imigassanik aalakoornartortaliortartunut imaluunniit imigassanik aalakoornartortalinnik nioqquteqartartunut.
- 2) Inunnut piginneqatigiiffinni il. il. imigassanik aalakoornartortaliortartunut imaluunniit imigassanik aalakoornartortalinnik nioqquteqartartunut pisortanut imaluunniit siulersuisunut ilaasunut.

Imm. 4. Interessentselskabini akisussaassuseqarlutik peqataasut tamarmik imigassanik aalakoornartortalinnik nioqquteqarsinnaanermut sassaalliteqarsinnaanermullu akuersissummik pigisaqassapput.

Imigassanik aalakoornartortalinnik

nioqquteqarsinnaanermut sassaalliteqarsinnaanermullu ingerlatseqatigiiffinnut akuersissut

§ 5. Ingerlatseqatigiiffiit imigassanik aalakoornartortalinnik nioqquteqarsinnaanermut sassaalliteqarsinnaanermullu akuersissut taamaallaat tunineqarsinnaavoq, imaattoqarpat

- 1) ingerlatseqatigiiffik akiliisinnaajunnaanermik pissutilimmik imaluunniit suliffeqarfiup aaqqissuuteqqinneranik ingerlatsiffigineqanngippat,
- 2) ingerlatseqatigiiffik pisortanut 50.000 koruuninik imaluunniit amerlanerusunik akiligassaareersunik akiitsoqassanngilaq,
- 3) pissutsinik imaattoqassanngilaq § 11 tunngavigalugu nioqquteqarsinnaanermut sassaalliteqarsinnaanermullu akuersissummik tunineqarsinnaanermut akornutaasunik, kiisalu
- 4) ingerlatseqatigiiffiup pisortaasa aamma siulersuisuisa § 8, imm. 1-imi aamma § 9, imm. 1-imi piumasaqaatit tamaasa naammassisimassavaat,

Imm. 2. Naalakkersuisut imm. 1, normu 2-mi kisitsisit allassimasut nalunaarut aqqutigalugu allannortissinnaavaat.

Imm. 3. Naalakkersuisut akuersissuteqaqqaartinnagit ingerlatseqatigiiffinnut il.il. imigassanik aalakoornartortalinnik nioqquteqarsinnaanermut sassaalliteqarsinnaanermullu akuersissut taamaallaat tunniunneqarsinnaavoq piumasaqaataasut allat tamarmik eqqortinneqarpata aamma ingerlatseqatigiiffiit maleruagassaanni aalajangersakkat ilaatinneqartut tassaappata

- 1) aktiat, piginneqatigiinnermut uppersaatit (anpartsbeviser) il.il. imigassanik aalakoornartortalinnik tunisassiornermik imaluunniit nioqquteqarnermik ingerlataqartunut pisiarisassanngortinneqarsinnaanngippata imaluunniit tunniunneqarsinnaanngippata,
- 2) aktiat, piginneqatigiinnermut uppersaatit (anpartsbeviser) il.il. tamarmik nalunaarneqassapput ateq ilanngullugu, kiisalu
- 3) aktianik, piginneqatigiinnermut uppersaatinik (anpartsbeviser) il.il. allanut tunniussisoqassappat siulersuisunit akuersissut imaluunniit anpartsselskabimi siulersuisoqanngitsumi pisortaasumit akuersissut piumasaqaataassapput.

Imm. 4. Taamatuttaaq Naalakkersuisunit akuersissut piumasaqaataavoq imigassanik aalakoornartortalinnik nioqquteqarsinnaanermut sassaalliteqarsinnaanermullu akuersissummik tunniussisoqassappat makkununga:

- 1) Ingerlatseqatigiiffinnut il. il. imigassanik aalakoornartortaliortartunut imaluunniit imigassanik aalakoornartortalinnik nioqquteqartartunut.

2) Ingerlatseqatigiiffinnut il. il. taakkunani pisortanut ilaasoq ataaseq imaluunniit ilaasut arlallit imaluunniit siulersuisuni ilaasortaasut imigassanik aalakoornartortalior tarpata imaluunniit imigassanik aalakoornartortalinnik nioqquteqartartuuppata.

§ 6. Suliffeqarfimmit ulluinnarni ingerlatsineq akuersissummik piginnittumit namminermit aqunneqassaaq imaluunniit pisortamit.

Peqatigiiffiit, klubbit il. il.

§ 7. Peqatigiiffiit, klubbit il.il. imigassanik aalakoornartortalinnik sassaalliuteqarnertut ittunik ingerlatsisut imigassanik aalakoornartortalinnik nioqquteqarsinnaanermut sassaalliuteqarsinnaanermullu akuersissummik peqassapput.

Imm. 2. Peqatigiiffiit, klubbit il. il. inimik aalajangersimasumik atugaqartut aamma akuttunngitsumik ammatitsisartut, feeriarnep nalaani matoqqanerit eqqaassanngikkaanni, imigassanillu aalakoornartortalinnik akiliuteqartitsillutik sassaalliuteqartartut imigassanik aalakoornartortalinnik nioqquteqarsinnaanermut sassaalliuteqarsinnaanermullu akuersissummik pigisaqassapput. Tamanna atuuppoq peqatigiiffimmut imaluunniit klubbimut ilaasortaasut kisimik sassaalliuteqarfineqartaraluarpataluunniit.

Imm. 3. Peqatigiiffinni aamma klubbini pineqartuni akisussaasuusutut siulersuisuusut namminneq inuttut § 4, imm. 1-imi normu 1-4 piumasaqaataasunik naammassinnissimassapput.

Imm. 4. Peqatigiiffiup imaluunniit klubbip siulersuisuini ilaasortanngortut nutaat aammattaaq namminneq inuttut § 4-mi, imm. 1-imi normu 1-4 piumasaqaataasunik naammassinnissimassapput.

Imm. 5. Taarsiisoqarnera pillugu nalunaarut kingusinnerpaamik allanngortoqarneranit ullut arfineq-marluk qaangiutsinnagit akuersissuteqartarnermut aalajangiisartunut tunniunneqassaaq.

Imm. 6. Naalackersuisut pisuni immikkut ittuni siulersuisuni ilaasortat qassinik ukioqarnissaannut piumasaqaataasut saneqqussinnaavaat, tak. § 12, imm. 2.

Pisortat

§ 8. Ingerlatseqatigiiffinni aamma suliffeqarfinni pisortat imigassanik nioqquteqarsinnaanermut sassaalliuteqarsinnaanermullu akuersissummik kissaateqartut § 4, imm. 1-imi normu 1-6-imut piumasaqaatit namminneq inuttut eqqortissavaat.

Imm. 2. Pisortanik nutaanik ilaasortaqaalerpat taakku aammattaaq inuttut namminneq § 4, imm. 1-imi normu 1-6-imut piumasaqaatinik eqqortissimassavaat.

Imm. 3. Taarsiisoqarnera pillugu nalunaarut kingusinnerpaamik allanngortoqarneranit ullut arfineq-marluk qaangiutsinnagit akuersissuteqartarnermut aalajangiisartunut tunniunneqassaaq.

Imm. 4. Naalackersuisut pisuni immikkut ittuni pisortat qassinik ukioqarnissaannut piumasaqaataasut saneqqussinnaavaat, tak. § 12, imm. 2.

Siulersuisuni ilaasortat

§ 9. Piginneqatigiiffinni, suliffeqarfinni il.il. siulersuisuni ilaasortat imigassanik aalakoornartortalinnik nioqquteqarsinnaanermut sassaalliteqarsinnaanermullu akuersissummik peqalernissamut kissaateqartut piumasaqaatit § 4-mi, imm. 1, normu 1-4-miittut namminneq inuttut eqqortissavaat.

Imm. 2. Siulersuisuni nutaamik ilaasortaataqalerpat taakku aammattaaq piumasaqaatit § 4-mi, imm. 1, normu. 1-4-miittut namminneq inuttut eqqortissimassavaat.

Imm. 3. Taarsiisoqarnera pillugu nalunaarut kingusinnerpaamik allannortoqarneranit ullut arfineq-marluk qaangiutsinnagit akuersissuteqartarnermut aalajangiisartunut tunniunneqassaaq.

Imm. 4. Naalackersuisut pisuni immikkut ittuni siulersuisunut ilaasortat qassinik ukioqarnissaannut piumasaqaataasut saneqqussinnaavaat, tak. § 12, imm. 2.

Pisortaatitat

§ 10. Suliffeqarfinni imigassanik aalakoornartortalinnik nioqquteqarsinnaanermut sassaalliteqarsinnaanermullu akuersissummik peqartuni pisortaatitat piumasaqaatit § 4-mi imm. 1, normu 1-6-imiittut eqqortissavaat.

Imm. 2. Pisortaatitaq akuersissuteqartarnermut aalajangiisartut akuersissutigisimassavaat. Akuersissuteqartarnermut aalajangiisartut akuerinninnissamut aalajangersaanerat ataatsimiinnermi pissaaq, imaluunniit siulittaasup qinnuteqaataasumik ilaasortanut nassiussineratigut allaganngorlugu taasinikkut aalajangiiffigisassanngortillugu.

Imm. 3. Akuersissuteqartarnermut aalajangiisartut imm. 2 tunngavigalugu qinnuteqaateqartoqareernerata kingornatigut, tassa sapaatit akunneri pingasut qaangiutsinnagit akuersissutiginninnertik aalajangersassavaat, imaanngippat soorlu assersuutigalugu suliap annertussusia imaluunniit katitigaanerata paasiuminaannera pissutigalugu tamanna pisinnaasimanani. Taamaattoqartillugu akuerineqarnissaminik qinnuteqaateqartoq kingusinnerpaamik piffissarititaasup qaangerneqarneranut patsisaasoq pillugu nalunaarfigineqassaaq, kiisalu aamma qaqugu qinnuteqaatip naammassillugu suliarineqarnissaa naatsorsuutigineqarsinnaanersoq pillugu.

Imm. 4. Akuersissuteqartarnermut aalajangiisartut pisortaatitap akuerineqarsinnaaneranut piumasaqaateqarsinnaapput.

Imm. 5. Naalackersuisut innersuussuteqarnerat tunngavigalugu akuersissuteqartarnermut aalajangiisartut pisortaatitat qassinik ukioqarnissaannut piumasaqaataasut saneqqussinnaavaat, tak. § 12, imm. 2.

Aningaasalersuineq il. il.

§ 11. Inuit aamma piginneqatigiiffiit il.il. imigassanik aalakoornartortalinnik nioqquteqarsinnaanermut sassaalliteqarsinnaanermullu akuersissummik sassaalliteqarnissamut pigisaqartut aammattaaq pisortanut ilaasut aamma siulersuisuni ilaasortaasut kiisalu suliffeqarfinnut taakkununga pisortaatitat Naalackersuisunit akuerineqassapput, tassa imigassanik aalakoornartortalinnik nioqqutissiortuniit imaluunniit nioqquteqartuniit tamakkiisumik

ilaannakuusumilluunniit taarsigassarsissagunik, tamakkununga ilaapput pequtinik attartorneq, aallaqqaasiutissanik imaluunniit tamakkununga nalinginnaasuunngitsumik akiitsoqarneq.

Imm. 2. Imm. 1-imi inuit aamma suliffeqarfiit pineqartut taamatutaaq Naalakkersuisunit akuerineqassapput pisussaaffinnut akuersissagunik, taakku naammassineqarnissaat imigassanik aalakoornartortalinnik nioqqutissiortunit imaluunniit nioqquteqartunit qularnaveeqquserneqarsimappata.

Imm. 3. Piumasaqaatit imm. 1-imi allassimasut taamatutaaq tunissutitut annertugisassaasumik naleqartunut atuupput, taakku imigassanik aalakoornartortalinnik nioqquteqarsinnaanermut sassaalliuteqarsinnaanermullu akuersissummik pigisaqartup suliffeqarfiutaani atorineqartussatut naatsorsuussaasimappata.

Imm. 4. Imm. 1-imi aalajangersagaq aningaasalersuisarfinnit taarsigassarsianut, aallaqqaasiutissanut imaluunniit qularnaveeqqusiissutitut atuutsinneqanngilaq, taakku ileqqoreqqusamikkut imigassanik aalakoornartortalinnik pisiniartarfinnut qilersorsimannginnermik qulakkeerinnissimasuuppata, taamaattumillu aalajangersagaq manna tunngavigalugu Naalakkersuisunit akuerineqarsimallutik.

Immikkut akuerineqarneq

§ 12. Akuersissuteqartarnermut aalajangiisartut illoqqarfinni mikinerusuni aamma nunaqarfinni pisiniarfinnut tunngatillugu § 4-imi, imm. 1-imi normu 1-imi piumasaqaammut, pisiniarfinni pisortanut aamma nunaqarfinni niuertunut immikkut akuersissummik tunniussisinnaappat.

Imm. 2. Naalakkersuisut, akuersissuteqartarnermut aalajangiisartut inassuteqaateqarnerat tunngavigalugu, suliffeqarfinni pisortanut, suliffeqarfinni, peqatigiiffinni imaluunniit klubbini siulersuisunut ilaasortanut § 4-imi, imm. 1-imi, normu 1-imi qassinik ukioqarnissaannut piumasaqaataasut saneqqussinnaavaat illoqqarfinnut mikinerusunut aamma nunaqarfinnut tunngatillugu.

Imigassanik aalakoornartortalinnik nioqquteqarsinnaanermut sassaalliuteqarsinnaanermullu akuersissutit suunerat Imigassanik aalakoornartortalinnik nioqquteqarsinnaanermut akuersissut

§ 13. Imigassanik aalakoornartortalinnik nioqquteqarsinnaanermut sassaalliuteqarsinnaanermullu akuersissutit suuneri tassaapput, imigassanik aalakoornartortalinnik nioqquteqarsinnaanermut akuersissutit:

- 1) Imigassanik aalakoornartortalinnik suussutsinik assigiinngitsunik tamanik nioqquteqarsinnaanermut akuersissut (suussuseq Nioqquteqarneq suussutsinut tamanut).
- 2) Imigassanik aalakoornartortalinnik imigassamik 16 volumenprocent angullugu akoqartunik taamaallaat nioqquteqarsinnaanermut akuersissut (suussuseq Nioqquteqarneq annerpaamik 16).

- 3) Imigassanik aalakoornartortalinnik imigassamik 4,10 volumenprocent angullugu akoqartunik taamaallaat nioqquteqarsinnaanermut akuersissut (suussuseq Nioqquteqarneq annerpaamik 4,10).

Imm. 2. Akuersissutip suunera akuersissummi erseqqilluinnartumik nalunaarneqarsimassaaq.

*Imigassanik aalakoornartortalinnik nioqquteqarsinnaanermut
sassaalliuteqarsinnaanermullu akuersissut
Imigassanik aalakoornartortalinnik sassaalliuteqarsinnaanermut akuersissut*

§ 14. Imigassanik aalakoornartortalinnik nioqquteqarsinnaanermut sassaalliuteqarsinnaanermullu akuersissutit tassaapput, imigassanik aalakoornartortalinnik sassaalliuteqarsinnaanermut akuersissutit:

- 1) Imigassanik aalakoornartortalinnik suussutsinik assigiinngitsunik tamanik sassaalliuteqarsinnaanermut akuersissut (suussuseq Sassaalliuteqarneq suussutsit tamaasa).
- 2) Imigassanik aalakoornartortalinnik imigassamik 16 volumenprocent angullugu akoqartunik taamaallaat sassaalliuteqarsinnaanermut akuersissut (suussuseq Sassaalliuteqarneq annerpaamik 16).
- 3) Imigassanik aalakoornartortalinnik imigassamik 4,10 volumenprocent angullugu akoqartunik taamaallaat sassaalliuteqarsinnaanermut akuersissut (suussuseq Sassaalliuteqarneq annerpaamik 4,10).
- 4) Imigassanik aalakoornartortalinnik § 15 tunngavigalugu mittarfinni, akunnittarfinni aamma takornarianik sammisaqartitsinerni akuersissut (suussuseq Sassaalliuteqarneq takornarianut).
- 5) Aaqquissuussinermut ataasiaannartumik ingerlanneqartussamut akuersissut imigassanik aalakoornartortalinnik imigassamik 16 volumenprocent angullugu akoqartunik taamaallaat sassaalliuteqarsinnaanermut akuersissut (Ataasiaannartumik atuuttussamik akuersissut annerpaamik 16).

Imm. 2. Akuersissutini suussutsini ukunani Sassaalliuteqarneq annerpaamik 16, Sassaalliuteqarneq annerpaamik 4,10 aammattaaq Ataasiaannartumik atuuttussamik akuersissut annerpaamik 16, taakkunani imigassaq aalakoornartoq akuusoq 16 volumenprocentimit kimittunerussangilaq.

Imm. 3. Akuersissutip suunera akuersissummi erseqqilluinnartumik nalunaarneqarsimassaaq.

Akunnittarfiit unnuisarfiusut, mittarfiit aamma takornarianut ingerlatsinerit

§ 15. Akuersissuteqartarnermut aalajangiisartut imigassanik aalakoornartortalinnik nioqquteqarsinnaanermut sassaalliuteqarsinnaanermullu mittarfinni aamma akunnittarfinni unnuisarfinni immikkut akuersissummik tunniussisinnaapput nal. 06.00-ip aamma 12.00-ip akornanni sassaalliuteqarsinnaanermut.

Imm. 2. Imm. 1 tunngavigalugu akuersissummi erseqqittumik nalunaarneqarsimassaaq piffissaq 06.00-imit aamma 12.00-ip akornat akuersissummi tunniunneqarmat.

Imm. 3. Piumasaqaatit imm. 1-imi aamma 2-mi taaneqartut assingi tunngavigalugit takornarianut ingerlatsinernut atatillugu immikkut akuersissummik tunniussisoqarsinnaavoq.

Imm. 4. Naalakkersuisut § 15-imi taaneqartunut mittarfinnut, akunnittarfinnut unnuisarfiusunut aamma takornarianut ingerlatsinernut tunngatillugu sassaalliuteqartarnerit pillugit erseqqinnerusunik malittarisassaliorsinnaapput.

Ataasiaannartumik atuuttussamik akuersissut

§ 16. Aaqqissuussinerni ataasiaannartuni tamanut ammasuni imigassanik aalakoornartortalinnik sassaalliuteqarneq ataasiaannartumik atuuttussamik akuersissummik peqartinnani inerteqqutaavoq. Taamatuttaaq atuuppoq aaqqissuussinerni ataasiaannartuni imigassanik aalakoornartortalinnik sassaalliuteqarnerit assersuunneqarsinnaasumik ingerlatsisoqarnerani.

Imm. 2. Ataasiinnartumik atuuttussamik akuersissut pissarsiarineqassaaq peqatigiiffiup, klubbip il.il. sassaalliuteqarnera ilaasortaannaanut tunngasuinnaagaluarpalluunniit aamma sassaalliuteqarnermut akiliuteqartitsisoqaraluarpalluunniit.

Imm. 3. Ataasiaannartumik atuuttussamik akuersissuteqarnerit aalajangersimasunik piumasaqaateqartoqarsinnaavoq, taakku aaqqissuussinermik tulluurtumik naammassinnissinnaanermut imaluunniit avatangiisinik aamma inuiaqatigiit sinnerinut tunngatillugu persaqusersuinissamut killilersuutitut atorineqarsinnaassallutik.

Imm. 4. Aalajangersakkat imm. 1 aamma 2-miittut apeqqutaatinnagit ataasiaannartumik atuuttussamik akuersissummik tunniussisoqarsinnaanngilaq, tassani siunertarineqarsimappat imigassanik aalakoornartortalinnik nioqquteqarsinnaanermut sassaalliuteqarsinnaanermullu akuersissummi aalajangersimasumi piumasaqaatit unioqqutinneqarnissaat siunertarineqarpat.

Imm. 5. Akuersissuteqartarnerit aalajangiisartut, imm. 1 tunngavigalugu aaqqissuussinerup ingerlanneqarnissaa, ullunik marlunnik sioqqullugu ataasiaannartumik atuuttussamik akuersissutip assilinera politiinut nassiuutissavaat.

§ 17. Ataasiaannartumik § 16 malillugu aaqqissuussinerni tamanut ammasuni imigassanik aalakoornartortalinnik taamaallaat 16 volumenprocenti tikillugu kimittussusilinnik sassaalliuteqartoqarsinnaavoq.

Imm. 2. Meeqqat aamma inuusuttut 18-it inorlugit ukiullit aaqqissuussinernut ataasiaannartumik atuuttussamik akuersissutitaqartumut taamaallaat peqataasinnaapput angajoqqaamik arlaannik, angajoqqaatut akisussaasuussuseqartumik imaluunniit inummik allamik inersimasumik nammineersinnaasumik ilaqarlutik, taanna inuusuttumut immikkut akisussaassuseqassaaq. Tamatumunnga aaqqissuussisoq aamma inuusuttup angajoqqaavi imaluunniit angajoqqaatut akisussaassuseqartoq akisussaasuussapput.

Immikkut aaqqissuussinerit matoqqasut

§ 18. Akuersissuteqartarnerit aalajangiisartut imigassanik aalakoornartortalinnik nioqquteqarsinnaanermut sassaalliuteqarsinnaanermullu akuersissummut atsiornermikkut

akuersissummik pigisaqartoq immikkut akuersissummik tunisinnaavaat ulluni sapaammiit sisamanngornermut nal. 05.00-ip tungaanut imigassanik aalakoornartortalinnik sassaalliuteqarsinnaanermut, tassani pineqarpata aaqqissuussinerit matoqqasut.

Imm. 2. Aaqqissuussineq imm. 1 tunngavigalugu ingerlanneqassaaq inini sassaalliuteqarnissamut atorneqartussatut akuerineqarsimasuni aamma sassaalliuteqarnissamut akuersissummik pigisaqartup akuersissummik pigisaqarneranut ilaasuni. Akuersissummik pigisaqartup aaqqissuussinerup ingerlanneqarnissaa pillugu politiit ilisimatissavai kingusinnerpaamik aaqqissuussinissaq ullunik marlunnik sioqqullugu.

Imm. 3 Naalakkersuisut imigassanik aalakoornartortalinnik nioqquteqarsinnaanermut sassaalliuteqarsinnaanermullu akuersissummut atsiortarnermut immikkut malittarisassalorsinnaapput aammattaq piffissami nal. 24.00 – 05.00-imut akuersissummut tunngatillugu atugassarititaasunut.

*Kollegiat, atuarfiit ulloq unnuarlu ineqarfittaqartut aamma
ulloq unnuarlu paaqqinnittarfiit allat*

§ 19. Kollegiat, atuarfiit ulloq unnuarlu ineqarfittaqartut aamma ulloq unnuarlu paaqqinnittarfiit allat inuusuttunut 18-it sinnerlugit ukioqartunut imigassamik aalakoornartortalimmik atuneq aamma angerlarsimaffiusup iluani pigisaqarneq imigassamik atuinermut politikki aqutugalugu killilersussavaat.

§ 20. Kollegiat, atuarfiit ulloq unnuarlu ineqarfittaqartut aamma ulloq unnuarlu paaqqinnittarfiit allat ataasiaannartumik atuuttussamik akuersissummik §§ 16 aamma 17 tunngavigalugu aaqqissuussinernut qinnuteqaateqarsinnaapput, tassani kissaatigineqarpat imigassanik aalakoornartortalinnik sassaalliuteqarnissaq.

Init aamma silami nunaminertat

§ 21. Akuersissut inimut aalajangersimasumut imaluunniit ininut aalajangersimasunut imaluunniit silami nunaminertanut attuumassuteqartinneqassaaq.

Imm. 2. Ininut sorlernut imaluunniit silami nunaminertanut sorlernut akuersissutip attuumassuteqartinneqarnera akuersissummi erseqqissumik allanneqarsimassapput.

Imm. 3. Init aamma silami nunaminertat imm. 1 tunngavigalugu akuersissummut attuumassuteqartinneqartut atorneqalinnginnerminni § 22 tunngavigalugu akuersissutigineqareersimassapput.

Nunaminertat aamma init sassaalliuteqarnermut atorneqartut

§ 22. Inuussutissarsiummik ingerlatsinermit ataatillugu imigassanik aalakoornartortalinnik sassaalliuteqarneq taamaallaat pisinnaavoq silami nunaminertani imaluunniit inini imerniartarfittut,

neriniartarfittut, akunnittarfittut il.il. suliarineqarsimasuni taamatullu atorneqarnissaminnut akuersissutigineqarsimasuni.

Imm. 2. Akuersissuteqartarnermut aalajangiisartut immikkut pissutsit tamanna pisariaqartippassuk, tamatumunnga ilanngullugit takornarianut tunngasunik aaqqissuussisoqartillugu, tamatuma malinneqannginnissaanut immikkut akuersissuteqarsinnaapput, tamatumani taamaallaat pineqarpata amigaataasut annikitsuinnaat, kiisalu isumannaallisaanermut imaluunniit peqqinnissamut tunngasunut attuumassuteqanngippata

Imm. 3. Akuersissuteqartarnermut aalajangiisartut taamatut immikkut akuersissuteqarnermut tunngasut pillugit politiinut nalunaaruteqartassapput.

§ 23. Naalakkersuisut init, silami nunaminertat aamma assigisaasa ilusilersorneqarnissaannut kiisalu atorneqarnissaannut maleruaqqusaliorsinnaapput, tamatumani pineqarput imigassanik aalakoornartortalinnik nioqquteqarfiit imaluunniit sassaalliuteqartarfiit. Maleruaqqusatigut aalajangersaaffigineqarsinnaapput iliuitsit eqqissisimanissaq aamma torersuunissaq atuutsinniarlugu aamma qulakkeerniarlugu suliffeqarfiup pisariaqanngitsumik allanut akornusersuinissaa.

Kapitali 3

Akuersissuteqartarnermut aalajangiisartut

§ 24. Kommuneqarfinni tamani kommunalbestyrelse akuersissuteqartarnermut aalajangiisartunik pilersitsissaaq.

Imm. 2. Akuersissuteqartarnermut aalajangiisartuni imm. 1 tunngavigalugu ilaasortat tassaapput:

- 1) kommunalbestyrelsimi ilaasortat akornanni toqqarneqartut marluk,
- 2) ilaasortaq ataaseq politiineersoq, Politimesterimit toqqarneqartoq,
- 3) ilaasortaq ataaseq pisiniarfinit aammattaaq takornariaqarnermik, akunnittarfinnik aamma neriniartarfinnik ingerlatsisut sinniisuutitaat Kalaallit Nunaanni Sulisitsisut (GE) toqqagaat,
- 4) kommuneqarfimmi inunnik isumaginnittoqarfiup sinniisuutitaat, kommuneqarfiup tamatuminnga ingerlatsivianit toqqagaasoq,
- 5) atuarfeqarfimmit sinniisuutitaq kommuneqarfiup tamatumunnga ingerlatsivianit toqqagaasoq imalluunniit peqqinnissaqarfimmit sinniisuutitaq, Nunap Immikkoortuani aqutsisunit toqqagaasoq, kiisalu
- 6) kommuneqarfimmi pinaveersaartitsinermut siunnersorti, kommuneqarfiup tamatuminnga ingerlatsivianit toqqagaasoq,

Imm. 3. Tamanna malillugu soorlu imm. 2-mi taaneqartoq ilaasortat ataasiakkaarlutik sinniisoqartinneqassapput.

Imm. 4. Akuersissuteqartarnermut aalajangiisartut akunnerminni inissitsissapput siulittaasoqarlutik, siulitaasup tullia kiisalu tallimanik nalinginnaasumik ilaasortaqarlutik.

Imm. 5. Akuersissuteqartarnermut aalajangiisartut aalajangiisinnaapput tamakkersimagaangamik.

Imm. 6. Aalajangiisartuni ilaasortaq kinaluunniit nipangiussisussaataavoq, tak. pinerluttulerinermi inatsimmi § 50 aamma §§ 52 – 54 pissutsit pillugit ilaasortap

akuersissuteqartarnermut aalajangiisartuni ilaasortaanerminut atatillugu ilisimaligai, tamatumunnga ilaavoq ilaasortat allat aalajangiisartuni ataatsimiinnerminni oqaaserisimasaat pillugit nipangiussisussaataaneq.

Imm. 7. Akuersissuteqartarnermut aalajangiisartut namminneq suleriaasissartik suliarissavaat, taamaattorli takuuk imm. 9.

Imm. 8. Naalackersuisut akuersissuteqartarnermut aalajangiisartut suleriaasissaannut aamma suliassaannut aalajangersakkanik aalajangersaasinnaapput.

Imm. 9. Akuersissuteqartarnermut aalajangiisartut pissusissamisoortumik kinaassutsiminnik uppersaateqarlutik ininut, inimut aamma silami nunaminertanut suliffeqarfinnut atasunut, Inatsisartut Inatsisaannut matumunnga attuumassuteqartinneqartunut ilaasunut, misissuiartorlutik isersinnaatitaapput. Akuersissummik pigisaqartup atortussat aamma paasissutissat akuersissuteqartarnermut aalajangiisartut apeqquteqaatigisaat tunniutissavai. Misissuilluni isersinnaatitaaneq ineeqqanut unnuiffissatut attartortinneqarsimasunut atuutinngilaq.

Qinnuteqaateqarneq

§ 25. Imigassanik aalakoornartortalinnik nioqquteqarsinnaanermut sassaalliteqarsinnaanermullu akuersissummik qinnuteqaat akuersissuteqartarnermut aalajangiisartunut tunniunneqassaaq.

Imm. 2. Imigassanik aalakoornartortalinnik nioqquteqarsinnaanermut sassaalliteqarsinnaanermullu akuersissummik qinnuteqaammut ilanngunneqassaaq suliffeqarfiup sulisuminut imigassartortarneq pillugu politikkaa.

Imm. 3. Imigassanik aalakoornartortalinnik nioqquteqarsinnaanermut sassaalliteqarsinnaanermullu ataasiaannartumik atuuttussamik akuersissummik, tak. §§ 16 aamma 17, qinnuteqaateqarnermut ilanngunneqassapput akisussaassuseqartumik sassaalliteqarnissamut aamma aaqquissuussinerup ingerlanneqarnissaanut pilersaarutit.

Imm. 4. Naalackersuisut imigassanik aalakoornartortalinnik nioqquteqarsinnaanermut sassaalliteqarsinnaanermullu akuersissummik qinnuteqaammut tunngatillugu sukumiinerusumik aalajangersaasinnaapput.

§ 26. Imigassanik aalakoornartortalinnik nioqquteqarsinnaanermut sassaalliteqarsinnaanermullu akuersissut ukiunut pingasunut atuuttussanngorlugu tunniunneqartassaaq

Imm. 2. Akuersissuteqartarnermut aalajangiisartut piffissamut sivikinnerusumut akuersissuteqarsinnaapput, tamatumunnga ilaapput ukiup ingerlanerani piffissami aalajangersimasumi niuertarfiit.

Imm. 3. Akuersissuteqartarnermut aalajangiisartut akuersissutigisinnaavaat nioqquteqartarneq imaluunniit sassaalliteqartarneq akuersissummik qinnuteqaatip tunniunneqarneraniilli aallartissinnaasoq. Immikkut akuersissut taamaattoq piffissamut killilimmut akuersissutitut tunniunneqartassaaq, taamaattorli sivisunerpaamik akuersissuterpiaq pillugu akuersissuteqartarnermut aalajangiisartut aalajangiinerata saqqummiunneqarnissaata tungaanut. Akuersissummi allassimassapput paasissutissat makkununnga tunngasut, akuersissut kimut

tunniunneqarnersoq, akuersissut akuersissummut sorlermut tunnganersoq, init suut akuersissummut ilaanersut kiisalu akuersissummut piumasagaataajunnartut ilanngullugit.

Imm. 4. Ukiuni pingasuni akuersissutip imm. 1 tunngavigalugu atuuffiata naareernerani, akuersissut sivitsorneqarsinnaavoq ukiunut 6-inut piffissalerlugu imaluunniit suli ukiuni pingasuni atuuttussatut sivitsorneqarluni. Akuersissummik ukiunut 6-inut piffissalerlugu tunniussinermi pingaartumik immikkut isiginiarneqassapput pissutsinik isornartorsiornartunik pisoqarsimanersoq, tassa sivisunerusumik akuersissummik tunniussinissamut akerliusinnaasunik.

Imm. 5. Akuersissutip sivitsorneqarnissaanut qinnuteqaat piffissap akuersissuteqarfiusup qaangiutinnginnerani tunniunneqarsimappat, kiisalu piffissamut akuersissuteqarfiusumut nutaamut apeqqut piffissap akuersissuteqarfiusup suli naannginnerani inaarutaasumik aalajangiiffigineqarsimanngippat, taava akuersissut suli atuutissaaq akuersissuteqartarnermut aalajangiisartut aalajangiisimanerata saqqummiunneqarnissaata tungaanut, taamaattorli sivisunerpaamik akuersissutip atorunnaarneraniit qaammatini pingasuni.

Imm. 6. Piffissami akuersissutip atuuffiani suliffeqarfimmu imaluunniit piginnittumut tunngassuteqartut annertuumik allannguuteqarpata akuersissut akuersissuteqartarnermut aalajangiisartut nutaamik isummerfigeqqissinnaavaat.

Akuersissummik pigisaqalerniarluni qinnuteqaatit suliarineqartarnerat

§ 27. Qinnuteqaammik suliarinninnermut atatillugu akuersissuteqartarnermut aalajangiisartut inuiaqatigiinnut, ileqqorissaarnissamut aamma pinaveersaartitsinnermut mianerisassat nalilissavaat, tamakkuninnga ataatsimut nalilersuereerlutik naleqquttumik imigassamik atuinissamut qulakkeerinnissapput.

Imm. 2. Akuersissut killilerneqarsinnaavoq imaluunniit atugassarititaasunik piumasagaatitaqarsinnaavoq tassa iluaqutaasinnaasunik naleqqunnerusumik imigassamik atuinissamut imaluunniit avatangiisusunut aamma inuiaqatigiit sinnerinut akornusersuisinnaanermut killilersuisunik.

Imm. 3. Akuersissuteqartarnermut aalajangiisartut akuersissutip assilnera politiinut nassiuatissavaat.

Imm. 4. Akuersissummik piginnittup akuersissut pigisani tamanut takuneqarsinnaasunngorlugu inissimatissavaa.

Imm. 5. Naalakkersuisut piumasagaatinut aamma atugassarititaasunut, tak. imm. 2, sukumiinerusumik aalajangersaasinnaapput.

Kapitali 4

Imigassanik aalakoornartortalinnik nioqquteqarsinnaanermut sassaalliteqarsinnaanermullu akuersissutip aamma akuerineqarsimanerup atorunnaarnerat

§ 28. Imigassanik aalakoornartortalinnik nioqquteqarsinnaanermut sassaalliteqarsinnaanermullu akuersissut atorunnaassaaq:

- 1) akuersissummik pigisaqartoq toqkkut qimaguppat, taamaattorli tak. imm. 2,
- 2) akuersissutip atuuffia naappat nutarterneqarnissaanillu qinnuteqaat akuersissuteqartarnermut aalajangiisartunut tunniunneqarsimanngippat,
- 3) akuersissummik pigisaqartup akuersissut pigisani atunngippagu,
- 4) akuersissummik pigisaqartoq inuussutissarsiornermut allagartamik pigisaqarunnaarpat,
- 5) akuersissummik pigisaqartoq akiliisinnaajunnaartutut nalunaarutigineqarpat,
- 6) piumasagaatit akuersissummut tunngasut eqqortinneqarunnaarpata,
- 7) akuersissummik pigisaqartoq § 4, imm. 1, normu 2-mi piumasagaatinik eqqortitsiunnaarpat imaluunniit
- 8) pisortap imaluunniit siulersuisuni ilaasortat amerlanerussuteqartut § 4, imm. 1, normu 2-mi, piumasagaataasunit eqqortitsisinnaajunnaarpata.

Imm. 2. Toqkkut qimagussimasup aapparisaakuersissummik nangitsinissaminut pisinnaatitaavoq pineqartoq ingerlatsinermut peqataasimaguni, kiisalu toqkkut qimaguttoq toqunissaa tikillugu inooqatigisimaguniuk tamatumalu saniatigut § 4-imi piumasagaatinik eqqortitsilluni. Akuersissuteqartarnermut oqartussat akuersissutigisinnaavaat aapparisaq qimataasoq suli 25-inik ukioqalersimanngitsaq akuersissummik nangitsisinnaanngorlugu.

Imm. 3. Akuersissuteqartarnermut aalajangiisartunut nalunaaruteqareernikkut toqusup qimataasa, katissimallugu aapparisaq kingornussassat suliarineqartinnagit (agguaanneqartinnagit) ingerlatseqqittup, akiliisinnaajunnaarnerup kingorna pigisat imaluunniit nammineersinnaajunnaarsitaasimasumut angajoqqaatut akisussaassuseqartuusup toqkkut qimaguttup, akiliisinnaajunnaarsimasup imaluunniit nammineersinnaajunnaarsitaasimasup suliffiutaa ingerlassinnaavaat, tamatumani taamaatikkiartuaarnissaa, tunineqarnissaa imaluunniit assingusumik pineqarnissaa imigassanik aalakoornartortalinnik nioqquteqarsinnaanermut sassaalliteqarsinnaanermullu akuersissummik nutaamik pigisaqartinnagu ingerlaqqinnissaa siunertaralugu. Taamaaliorinnaaneq toqusoqarnerata, akiliisinnaajunnaarnerup nalunaarutigineqarnerata imaluunniit nammineersinnaajunnaartitsinerup kingorna ukiumi ataasiinnarmi atuuppoq. Immikkut ittumik pisoqartillugu akuersissuteqartarnermut aalajangiisartut piffissarititaasoq sivitsorsinnaavaat.

Imm. 4. Pisortaatitap akuersissutigineqarsimanera, tak. § 10 atuukkunnaassaaq pineqartoq § 4, imm. 1-imi normu 2-mi piumasagaataasunik naammassinnissinnaajunnaarpat.

Kapitali 5

Arsaarinnissuteqarneq

§ 29. Imigassanik aalakoornartortalinnik nioqquteqarsinnaanermut sassaalliteqarsinnaanermullu akuersissummik pigisaqarnissamut pisinnaatitaaffik arsaarinnissutigineqarsinnaavoq akuersissummik pigisaqartoq imigassanik aalakoornartortalinnik nioqquteqarsinnaanermut sassaalliteqarsinnaanermullu akuersissummi piumasagaataasunik annertuumik imaluunniit uteqqiattumik unioqqutitsisimappat, inatsimmik imaluunniit najoqqutassanik inatsit tunngavigalugu

atuuttuutinneqartunik imaluunniit Kalaallit Nunaanni pinerluttulerinermi inatsimmik unioqutitsisimappat.

§ 30. Pisortaatitap akuersissutigineqarsimanera, tak. § 10, arsaarinnissutigineqarsinnaavoq pisortaatitap inatsimmik imaluunniit najoqqutassanik inatsit tunngavigalugu atuuttuutinneqartunik annertuumik imaluunniit uteqqiattumik unioqutitsisimappat, imaluunniit Kalaallit Nunaanni pinerluttulerinermi inatsimmik unioqutitsisimappat.

§ 31. Arsaarinnissuteqarnissamut aalajangersaanerit eqqartuussivinnit aalajangersaaffigineqartassapput

Kapitali 6

Atorunnaarsitsineq

§ 32. Imigassanik aalakoornartortalinnik nioqquteqarsinnaanermut sassaalliteqarsinnaanermullu akuersissut utaqqiisaagallartumik imaluunniit ataavartumik atorunnaarsinneqarsinnaavoq patsisissaqarluartumik isumaqartoqarpat akuersissummik pigisaqartoq suliffeqarfimmik isumannaatsumik ingerlatsiumanngitsoq imaluunniit ingerlatsisinnaanngitsoq.

Imm. 2. Siullermik unioqutitsinerni imaluunniit sumiginnaanerni annikitsuni akuersissuteqartarnermut aalajangiisartut toqqarsinnaavaat allakkatigut mianersoqqusummik tunniussinissartik, tassunga ilanngunneqassapput taamatut pisoqaqqinneratigut akuersissummik utaqqiisaagallartumik atorunnaarsitsisoqarsinnaanera imaluunniit ataavartumik atorunnaarsitsisoqarsinnaanera.

Imm. 3. Aalajangersaanerit imm. 1-imi aamma 2-mik tunngaveqartut akuersissuteqartarnermut aalajangiisartut aalajangersartassavaat.

§ 33. Pisortaatitap akuersissutigineqarsimanera, tak. § 10, atorunnaarsikkallarnejarsinnaavoq patsisissaqarluartumik isumaqartoqarpat pisortaatitap suliassaqartitaanerminik isumannaatsumik ingerlatsisimangippat.

Imm. 2. Siullermik unioqutitsinerni imaluunniit sumiginnaanerni annikitsuni akuersissuteqartarnermut aalajangiisartut toqqarsinnaavaat allakkatigut mianersoqqusummik tunniussinissartik, tassunga ilanngunneqassapput taamatut pisoqaqqinneratigut akuersissummik utaqqiisaagallartumik atorunnaarsitsisoqarsinnaanera imaluunniit ataavartumik atorunnaarsitsisoqarsinnaanera.

Imm. 3. Aalajangersaanerit imm. 1-imi aamma 2-mik tunngaveqartut akuersissuteqartarnermut aalajangiisartut aalajangersartassavaat.

§ 34. Ataasiaannartumik atuuttussamik akuersissut akuersissuteqartarnermut aalajangiisartunik arsaarinnissutigineqarsinnaavoq, inatsimmi matumani imaluunniit ataasiaannartumik atuuttussamik akuersissummi piumasaqaataasut eqqortinneqarsimanngippata.

Imm. 2. Aalajangersaanerit imm. 1-imi tunngaveqartut akuersissuteqartarnermut aalajangiisartut aalajangersartassavaat.

§ 35. Imigassanik aalakoornartortalinnik nioqquteqarsinnaanermut sassaalliuteqarsinnaanermullu akuersissut atorunnaarsinneqarallarsinnaavoq akuersissummik piginnittoq pisortanut akiligassanik akilerneqareertussanik 50.000 koruuninik imaluunniit taakku sinnerlugit akiitsoqarpat.

Imm. 2. Aalajangersaanerit imm. 1-imi tunngaveqartut akuersissuteqartarnermut aalajangiisartut aalajangersartassavaat.

§ 36. Atorunnaarsitsinernut §§ 32 - 35 tunngavigalugit aalajangersarneqartunut naammagittaalliutit suliarineqartassapput kapitali 14-mi, aalajangiinerit pillugit naammagittaalliuteqartarnermut aamma eqqartuussisutigut misissuititsisinnaaneq pillugit aalajangersakkat tunngavigalugit.

Kapitali 7

Akuersissutinik aamma akuerineqarnernik arsaarinnissuteqarneq kiisalu atorunnaarsitsinerit pillugit ataatsimut aalajangersakkat

§ 37. Imigassanik aalakoornartortalinnik nioqquteqarsinnaanermut sassaalliuteqarsinnaanermullu akuersissut §§ 28-mit – 35-mut aalajangersakkat tunngavigalugit atorunnaarsitsineqarpat, arsaarinnissutigineqarpat aamma atuukkunnaarsinneqarpat, taava akuersissummik pigisaqartup akuersissut ingerlaannartumik akuersissuteqartarnermut aalajangiisartunut utertillugu nassiutissavaa.

Imm. 2. Akuersissuteqartarnermut aalajangiisartut akuersissutip atorunnaarsinneqarnera, arsaarinnissutigineqarnera imaluunniit atuukkunnaarsinneqarnera politiinut nalunaarutigissavaat.

Kapitali 8

*Imigassanik aalakoornartortalinnik nioqquteqartarneq aamma sassaalliuteqartarneq
Imigassanik aalakoornartortalinnik 16 volumenprocenteqartunik taakkulu sinnerlugit
kimittussusilinnik nioqquteqartarneq*

§ 38. Imigassanik aalakoornartortalinnik 16 volumenprocenteqartunik taakkulu sinnerlugit kimittussusilinnik nioqquteqartarneq pisinnaavoq:

- 1) Ataasinngornermit - tallimannngornermut nal. 09.00-imiit – 18.00-imut, taamaattorli imm. 2 takuuk.
- 2) Arfininngornermi nal. 09.00-imiit – 13.00-imut, taamaattorli takuuk imm. 2.
- 3) Ukiutoqqami nal. 09.00 – 13.00

Imm. 2. Taamaattorli imm. 1-imi aalajangersakkat qanoq ittuugaluarpataluunniit tuniniaasoqqaqusaanngilaq:

- 1) Ukiortaami.
- 2) Kunngit pingasut ulluanni.
- 3) Sisamangornermi Illernartumi, Tallimangornermi Tannaartumi, Poorskip ulluani aamma Poorskip aappaani.
- 4) Tussiarfissuarmi.
- 5) Qilaliarfimmi.
- 6) Piinsip ulluani aamma piinsip aappaani.
- 7) Nunatta Ulluani.
- 8) Juulliaqqami, juullerujussuarmi aamma juullip aappaani.

Imigassanik aalakoornartortalinnik 16 volumenprocentit angullugit kimittussusilinnik nioqquteqartarneq

§ 39. Imigassanik aalakoornartortalinnik 16 volumenprocentit angullugit kimittussusilinnik nioqquteqartarneq pisinnaavoq:

- 1) Ataasinngornermit - tallimangornermut nal. 09.00-imiit – 20.00-imut, taamaattorli imm. 2 takuuk.
- 2) Arfininngornermi nal. 09.00-imiit – 13.00-imut, taamaattorli takuuk imm. 2.
- 3) Ukiutoqqami nal. 09.00 – 13.00

Imm. 2. Taamaattorli imm. 1-imi aalajangersakkat qanoq ittuugaluarpataluunniit tuniniaasoqaqqusaanngilaq:

- 1) Ukiortaami.
- 2) Kunngit pingasut ulluanni.
- 3) Sisamangornermi Illernartumi, Tallimangornermi Tannaartumi, Poorskip ulluani aamma Poorskip aappaani.
- 4) Tussiarfissuarmi.
- 5) Qilaliarfimmi.
- 6) Piinsip ulluani aamma piinsip aappaani.
- 7) Nunatta Ulluani.
- 8) Juulliaqqami, juullerujussuarmi aamma juullip aappaani.

Nerisassanik angerlarsimaffinnut aanneqartussanik nioqquteqarneq (Diner Transportable)

§ 40. Imigassanik aalakoornartortalinnik nioqquteqarnermi, nerisassanik angerlarsimaffinnut aanneqartussanik (diner transportable) pisititsinermut atatillugu pisumi, imigassap nioqqutigineqartup annertussusiata annerpaamik nerisassat nioqqutigineqartut akiisa 50 %-iterissavaat.

Imm. 2. Nioqquteqarneq imm. 1 tunngavigalugu ingerlanneqarsinnaavoq ataasinngornermit - sapaammut nal. 12.00-imiit – 20.00-imut, taamaattorli imm. 3 takuuk.

Imm. 3. Aalajangersakkat imm. 2-mi apeqquataatinnagit imigassanik aalakoornartortalinnik 16 volumenprocentit angullugit kimittussusilinnik nioqquteqartarneq taamaallaat ulluni makkunani pisinnaavoq:

- 1) Sapaatini.
- 2) Ukiortaami.
- 3) Sisamangornermi Illernartumi, Tallimangornermi Tannaartumi, Poorskip ulluani aamma Poorskip aappaani..
- 4) Piinsip ulluani aamma piinsip aappaani.
- 5) Juulliaqqami, juullerujussuarmi aamma juullip aappaani.

Imm. 4. Nerisassanik angerlarsimaffinnut aanneqartussanik nioqquteqarnermut atatillugu imigassanik aalakoornartortalinnik nioqquteqarneq taamaallaat ininit inuussutissarsiummik ingerlatsiffiusussatut akuerineqarsimasuniit ingerlanneqarsinnaavoq.

Pisiniarfinni imigassanik aalakoornartortalinnik assiaqusersuineq

§ 41. Pisiniarfiit anginerusut imigassat aalakoornartortallit pisiniarfimmi nioqqutissanit allanit assiaquteqartissavaat, tassa imigassanut aalakoornartortalinnut ini immikkut pilersinneqassaaq immikkut isertarfilerlugu.

Imm. 2. Pisiniarfiit mikinerusut tamatumunnga taarsiullugu imigassat aalakoornartortallit pisiniarfimmi nioqqutissanit allanit assiaqusersinnaavaat, tassa imaalillugit imigassanut aalakoornartortalinnut imikkoortoq pilersinneqassaaq tassani taakku ingerlaannaq takuneqartussaajunnaarlugit.

Imm. 3. Nerisassanik angerlarsimaffinnut aanneqartussanik nioqquteqarfinni (Diner Transportable) inuit aaqquissuusaanerisa, Naalackersuisut tamanna pillugu sukumiinerusumik aalajangersaanerat tunngavigalugu, imm. 1-imi aamma imm. 2-mi aalajangersakkat pisiniarfinni imigassanik aalakoornartortalinnik assiaqusersuineq malinneqartussanngortinneqarsinnaavoq.

Imm. 4. Imigassat aalakoornartortallit imigassamik 16 volumenprocentimik taannalu sinnerlugu akoqartut imigassanik aalakoornartortalinnit assiaquserneqassapput ataasinngornermiit tallimangornermut nal. 18-imiit kiisalu arfininngornikkut nal. 13.00-imiit.

Imm. 5. Naalackersuisut pisiniarfiit anginerusut aamma mikinerusut akornanni killiliinernut tunngatillugu sukumiinerusumik maleruaqqusanik aalajangersaasinnaapput aammattaaq ininut immikkut isertarfilinnut assiaqusersuinissamut, tak. imm. 1, kiisalu immikkoortumik pilersitsilluni assiaqusersuinissamut, tak. imm. 2. Taamatuttaaq Naalackersuisut immikkut aalajangersakkanik pilersitsissapput assiaqusersuinerup, tak. imm. 1 aamma 2, piffissami qaqugu naammassineqarnissaanut tunngasumik.

*Imigassanik aalakoornartortalinnik 16 volumenprocenteqartunik taakkulu sinnerlugit
kimittussusilinnik sassaalliteqartarneq*

§ 42. Imigassanik aalakoornartortalinnik 16 volumenprocenteqartunik taakkulu sinnerlugit kimittussusilinnik sassaalliteqartarneq ingerlanneqassaaq:

- 1) Ataasinngornermit - sisamangornermut 12.00-imiit – 24.00-imut, taamaattorli imm. 2 takuuk.
- 2) Tallimangornermi aamma arfininngornermi nal. 12.00 - 05.00, taamaattorli imm. 2 takuuk.
- 3) Ukiutoqqami nal. 12.00 - 05.00.
- 4) Kunngit Pingasut Ulluanni nal. 12.00 - 24.00.
- 5) Sisamangornerup Illernartup siornatigut unnukkut nal. 12.00 - 05.00.
- 6) Tussiarfissuup siornatigut unnukkut nal. 12.00 - 05.00.
- 7) Qilaliarfiup siornatigut unnukkut nal. 12.00 - 05.00.
- 8) Nunatta Ulluani nal. 18.00 - 24.00.

Imm. 2. Aalajangersakkat imm. 1-imi apeqqutaatinnagit imigassanik aalakoornartortalinnik 16 volumenprocentit taakkulu sinnerlugit kimittussusilinnik sassaalliteqartarneq ulluni makkunani pisinnaangilaq:

- 1) Sapaatini.
- 2) Ukiortaami.
- 3) Sisamangornermi Illernartumi, Tallimangornermi Tannaartumi, Poorskip ulluani aamma Poorskip aappaani
- 4) Piinsip ulluani aamma Piinsip aappaani.
- 5) Juulliaqqami, juullerujussuarmi aamma juullip aappaani.

*Imigassanik aalakoornartortalinnik 16 volumenprocentit angullugit kimittussusilinnik
nioqquteqartarneq*

§ 43. Imigassanik aalakoornartortalinnik 16 volumenprocentit angullugit kimittussusilinnik sassaalliteqartarneq ingerlanneqassaaq:

- 1) Ataasinngornermit - sisamangornermut 12.00-imiit – 24.00-imut, taamaattorli imm. 2 takuuk.
- 2) Tallimangornermi aamma arfininngornermi nal. 12.00 - 05.00, taamaattorli imm. 2 takuuk.
- 3) Ukiutoqqami nal. 12.00 - 05.00.
- 4) Kunngit Pingasut Ulluanni nal. 12.00 - 24.00.
- 5) Sisamangornerup Illernartup siornatigut unnukkut nal. 12.00 - 05.00.
- 6) Tussiarfissuup siornatigut unnukkut nal. 12.00 - 05.00.
- 7) Qilaliarfiup siornatigut unnukkut nal. 12.00 - 05.00.
- 8) Nunatta Ulluani nal. 8.00 - 24.00.

Imm. 2. Aalajangersakkat imm. 1-imi apeqqutaatinnagit imigassanik aalakoornartortalinnik 16 volumenprocentit angullugit kimittussusilinnik sassaalliteqartarneq ulluni makkunani piffissanilu ukunani ingerlanneqassaaq:

- 1) Ukiortaami nal. 12.00 - 24.00.

2) Sisamangornermi Illernartumi, Tallimangornermi Tannaartumi, Poorskip ulluani aamma Poorskip aappaani piffissami nal. 12.00 - 24.00.

3) Piinsip ulluani aamma Piinsip aappaani nal. 12.00 - 24.00.

4) Juulliaqqami aamma juullerujussuarmi nal. 18.00 - 21.00.

5) Juullip aappaani nal. 12.00 - 24.00

Imm. 3. Imigassaq, imerneqartussamut akuliunneqartoq, 16 volumenprocentimik sinniissanngilaq.

Imm. 4. Ataasiaannartumik atuuttussamik akuersissutini, tak. §§ 16 aamma 17, sassaalliteqartoqassaaq nal. 12.00-imiit – 24.00-imut. Qinnuteqaateqarsimaneq tunngavigalugu akuersissuteqartarnermut aalajangiisartut tamanna saneqqussinnaavaat nal. 05.00-ilu tikillugu sassaalliteqarsinnaaneq akuersissutigalugu.

Imm. 5. Aalajangersagaq imm. 4-miittoq apeqqutaatinnagu juulliaqqami aamma juullerujussuarmi taamaallaat sassaalliteqartoqarsinnaavoq nal. 18.00-imiit - 21.00-imut, kiisalu Nunatta Ulluani piffissami nal. 18.00-imiit - 24.00-imut.

Kapitali 9

Akuersissummik pigisaqartup pisussaaffii allat pillugit aalajangersakkat

§ 44. Inunnut takuneqarsinnaasumik aalakoortunut imigassanik aalakoornartortalinnik pisititsineq imaluunniit sassaalliteqarneq akuerineqanngilaq.

Imm. 2. Akuersissummik pigisaqartoq imm. 1-imi inertequtaasutut taaneqartoq pillugu isersimasunut takuneqarsinnaasunngorlugu allagarsiisimassaaq.

§ 45. Akuersissummik pigisaqartumut aamma sulisunut piffissami tassani sulisuusunut isersimasut peqatigalugit imigassanik aalakoornartortalinnik imigaqarnissaq akuerineqanngilaq.

§ 46. Neriniartarfinni aamma sassaalliteqartarfinni allani immiaaqqanik kimikitsunik, viinninik imigassartakitsunik, imeruersaatini il.il. sassaalliteqarnissaq periarfissaassaaq. Tamanna akigitinneqartut allattorsimaffianni imaluunniit viinnit allattorsimaffianni erseqqissumik takuneqarsinnaassaaq. Imeq sikuligaq saqqumitinneqassaaq isersimasunit akeqanngitsumik atugassanngorlugu.

§ 47. Akuersissummik pigisaqartoq imerneqarsinnaasunut akiinik aalajangersimasunik akigititaqassaaq.

Imm. 2. Akuersissummik pigisaqartoq inimi isersimasunit takuneqarsinnaallutik inissinneqarsimasunik imerneqarsinnaasut tamarmik akiinik akigitinneqartunik allattorsimaffinnik saqqumititsissaaq.

§ 48. Akuersissummik pigisaqartup sulisui akisussaassuseqartumik imigassanik aalakoornartortalinnik tuniniaanermut aamma sassaalliteqarnermut pikkorissarnernut peqataassapput. Pikkorissarnerit Naalackersuisunit imaluunniit taamatut iliornissamut Naalackersuisunit piginnaatinneqarsimasumit neqeroorutigineqassapput.

Inuusuttut aamma inuit 18-it inorlugit ukioqartut

§ 49. Imigassanik aalakoornartortalinnik inunnut 18-it inorlugit ukiulinnut tuniniaaneq imaluunniit sassaalliuteqarneq akuerineqanngillat.

Imm. 2. Inerteqqutigineqartoq imm. 1-imi pineqartoq pillugu isersimasunit takuneqarsinnaasunngorlugu allagarsiissutigineqassaaq.

Imm. 3. Akuersissummik pigisaqartup imaluunniit nioqquteqarnermut imaluunniit sassaalliuteqarnermut ingerlatsisup akisussaaffigaa qulakkeerniassallugu imm. 1-imi qassinik ukioqarnissamut aalajangersakkap uppersaasertinnissaa.

Imm. 4. Nal. 20.00-ip kingorna inuusuttut 18-it inorlugit ukioqartut neriniartarfinnut aamma sassaalliuteqartarfinnut allanut imigassanik aalakoornartortalinnik sassaalliuteqartartunut iseqqusaanngillat imaanngippat angajoqqaanik, nakkutiginnittumik imaluunniit inummik inersimasunngoreersimasumik allamik inuusuttumut immikkut akiussaassuseqartumik ingiaqateqarlutik. Akuersissummik pigisaqartup aamma taassuma sulisuisa pisussaaffigaa nakkutigissallugu inuusuttup 18-it inorlugit ukioqartup pissusissamisoortumik ingiaqatigisaqarnissaa.

Imm. 5. Taamaattorli imm. 4 tunngavigalugu inerteqqutigineqartoq atuutinngilaq umiarsuit pineqartillugit, tamatumani Søfartsstyrelsenimit ilaasut amerlassusissaat akuersissutigineqarsimappat, tassunga ilanngunneqarsimallutik umiarsuarmi neriniartarfimmi issiavissat amerlassusiat.

§ 50. Inuit 18-it inorlugit ukiullit, taamaattorli ilinniartut aamma praktikkertut pineqanngillat, imigassanik aalakoornartortalinnik tuniniaanermik imaluunniit sassaalliuteqarnermik suliaqqusaanngillat.

Imm. 2. Ilinniartut aamma praktikkertut toqqaannartumik imigassanik aalakoornartortalinnik nioqquteqarnermik aamma sassaalliuteqarnermik suliaqartinneqarpata, tamatumani tamatigut qulakkeerneqassaaq sulisut naammattut 21-t sinnerlugit ukioqartut ilinniartut aamma praktikkertut peqatigalugit najuunnissaat.

§ 51. Inuit 21-t inorlugit ukioqartut neriniartarfinni aamma sassaalliuteqartarfinni allani matulerisutut sulisoreqqusaanngillat.

§ 52. Inuusuttunut 18-it inorlugit ukiulinnut imigassanik aalakoornartortalinnik sassaalliuteqarfigineqarneq, pisiniarneq imaluunniit allatut pissarsiniarneq inerteqqutaavoq.

Sassaalliuteqartarfinnit annissassanik nioqquteqarneq

§ 53. Neriniartarfinniit aamma sassaalliuteqartarfinnit allaniit imigassanik aalakoornartortalinnik annissassanik nioqquteqartoqqaqusaanngilaq, tamanna nerisassanik angerlarsimaffinnut aanneqartussanik (Diner transportable) atatillugu ingerlanneqanngippat.

§ 54. Umiarsuit umiarsualivinniittut ilaasuunngitsunut imigassanik aalakoornartortalinnik nioqquteqaqqusaanngillat imaluunniit sassaalliuteqaqqusaanngillat.

Piffissaq matusiffiususaaq

§ 55. Neriniartarfiit aamma sassaalliuteqartarfiit allat piffissap sassaalliuteqarsinnaaffiusup qaangiunnerata kingornatigut nalunaaquttap akunnera ataaseq tikillugu ammatinneqarsinnaapput.

Imm. 2. Piffissap matoqqanerup nalaani, nalunaaquttap akunnera siulleq eqqaassanngikkaanni, politiinit akuersissuteqartoqartinnagu neriniartarfiit - imaluunniit sassaalliuteqartarfiit initaanni isersimasoqaqqusaanngilaq, imaanngippat tamanna pisariaqavilluni ullormut tunisanik kisitsineq, eqqiaaneq imaluunniit paarsisariaqarneq pissutigalugit.

Imm. 3. Taamaattorli tamanna atuutinngilaq umiarsuit pineqartillugit, tamatumani Søfartsstyrelsenimit ilaasut amerlassusissaat akuersissutigineqarsimappat, tassunga ilanngunneqarsimallutik umiarsuarmi neriniartarfimmi issiavissat amerlassusiat.

Kapitali 10

Imigassaq ikiaroorartullu pillugit Siunnersuisooqatigiit

§ 56. Imigassaq ikiaroorartullu pillugit Siunnersuisooqatigiit Naalakkersuisuinit pilersinneqarsimasut imigassanut ikiaroorartunullu tamanut apeqqutit nalinginnaasut pillugit Naalakkersuisunut siunnersuisuussapput. Siunnersuisooqatigiit namminneq siulitaasuminnik aamma siulitaasup tullianik toqqaassapput, kiisalu suleriaasissartik namminneq aalajangersassavaat.

Imm. 2. Siunnersuisooqatigiit pisussaaffigaat imigassanik aalakoornartortalinnik, ikiaroorartunik aamma assigisaanik atornerluinernut tunngasuni ineriartorneq malinnaaffigissallugu, kiisalu tamanna pillugu ukiumoortumik Naalakkersuisunut nalunaarusiortassallutik.

Kapitali 11

Imigassanik aalakoornartortaliliorneq

§ 57. Nammineq atugassanik imigassanik aalakoornartortalinnik immiorneq inerteqqutaavoq.

Imm. 2. Immiassanik (malt), sungarnitsussanik (humle) aamma akuutissanik nammineq atugassanik eqqussineq inerteqqutaavoq.

Imigassanik aalakoornartortalinnik pilerisaarineq

§ 58. Imigassanik aalakoornartortalinnik pilerisaarineq qanoq ikkaluartorluunniit aviisini neqerooruteqarfiusuni, aviisini akeqanngitsuni, tusagassiuutini ullormut saqqummersartuni, radiumi aamma tv-mi assigisaannilu aammattaq nittartakkani, inoqatinut attaveqaatitigut aamma assigisaatigut inerteqqutaavoq.

Imm. 2. Aviisit, atuagassiat, atuagassiat sapaatit akunneranut saqqummersartut aamma assiliat atorlugit tusagassiutit nunanit allaneersut imm. 1-imi inerteqqutinut ilaatinneqanngillat.

Imm. 3. Taamaattorli imm. 1-imi inerteqqutigineqartoq atuutinngilaq immiaaqqanik aamma viinninik assigisaannillu misiliititsiniarnermik aqqissuussinerni matoqqasuni peqataaniarluni nalunaaqqaarfiususanut pilerisaaruteqarnermi. Taamaattorli pilerisaarineq imigassanik aalakoornartortalinnik ilaqartinneqassanngilaq.

Imm. 4. Pisiniarfinni aamma nioqquteqarfinni taakkununga assingusuni imigassanik aalakoornartortalinnik tunniussisoqaqqusaanngilaq, akeqanngitsumik imaluunniit akilersillugit pissutsit taamaattut nittarsaassinertut imaluunniit sassaalliteqarnertut isigineqarsinnaalissappata.

Automatit atorlugit nioqquteqarneq

§ 59. Imigassanik aalakoornartortalinnik automatit atorlugit nioqquteqarneq imaluunniit sassaalliteqarneq inerteqqutaavoq.

Kapitali 12

Eqqissiviilliornerit aamma sioorasaarisutut pissusilersornerit

§ 60. Politiit inuit, neriniartarfimmi imaluunniit sassaalliteqartarfimmi isersimanerminnut atatillugu pinerluttuliornermik iliuseqarsimasut, neriniartarfimmi aamma sassaalliteqartarfimmi aalajangersimasuni isersimasinnaanerit inerteqqutigisinnaavaat. Taamatuttaaq politiit neriniartarfimmut imaluunniit sassaalliteqartarfimmut inerteqqutigisinnaavaat isersimasut 18-it inorlugit ukioqartut isersimanginnissaat, neriniartarfimmi imaluunniit sassaalliteqartarfimmi pissutsit immikkut imaappata sumiiffik meeqqanut inuusuttunullu isersimaffigissallugu naleqqunnani.

§ 61. Politiit tamanna pisariaqartutut nalilerneqarpat sukkulluunniit eqqartuussisunik akuersissummik pigisaqarnatik ininut aamma silami nunaminertanut, suliffeqarfinnut inatsimmi matumani pineqartunut atasunut isersinnaatitaapput. Tamannali ineeqqanut unnuiffissatut attartortinneqarsimasunut atuutinngilaq.

§ 62. Sumiiffinni imigassanik aalakoornartortalinnik nioqquteqarfiusuni imaluunniit sassaalliteqarfiusuni, tassungalu kikkut tamarmik isersinnaappata, taava nipiliorluni, nakuuserluni, ajuallatsitsiniarluni imaluunniit assigisaannik ileqqulersorneq inerteqqutaavoq, taamaaliorneq tassaasinnaappat tamat ornittagaanni eqqissiviillortitsinermik imaluunniit allanut tamaaniittunut imaluunniit eqqaani najugaqartunut akornusersuutaasumik kinguneqarsinnaappat.

Imm. 2. Arlaannit imm. 1-imi taaneqartut unioqqutinneqarpata, taava akuersissummik piginnittoq imaluunniit taassumunnga taartaasoq pissutsinik uparuaassaaq pisariaqarpallu pineqartoq qimaguteqqullugu imaluunniit politiinik aggeqqusilluni.

§ 63. Nioqquteqartarfimmi imaluunniit sassaalliteqartarfimmi kamaattoqarsimappat imaluunniit malunnartumik eqqissiviillioortoqarsimappat, taava politiit naalakkiutigisinnaavaat sumiiffiup piffissap ammasarfiup sinnerani matuneqarnissaa.

Imm. 2. Politiit imm. 1 tunngavigalugu taamatut matuseqqusisimaneq piaarnerpaamik akuersissuteqartarnermut aalajangiisartunut nalunaarutigineqassaaq.

§ 64. Politiit nalilerunikku tuniniaasarfimmut – imaluunniit sassaalliteqartarfimmut atatillugu nakuusernermik pissusilersortoqarsinnaanera immikkut aarlerinaateqartoq, taava politiit peqqussutigisinnaavaat suliffiup isumannaatsuunissaanut tunngatillugu immikkut aaqquussuussisoqarnissaa.

Imm. 2. Peqqussuteqarnermut imm. 1 tunngavigalugu politiit aaqquussuussinerup ingerlanneqarnissaanut kingusinnerpaamik piffissaliillutik aalajangiissapput.

Imm. 3. Peqqussuteqarnerit imm. 1 aamma 2 tunngavigalugit piffissarititaasup iluani naalanneqarsimangippata akuersissuteqartarnermut aalajangiisartut, politiit inassuteqarnerat tunngavigalugu akuersissut arsaarinnissutigisinnaavaat, isumannaatsuunissamut aaqquussuussinissamut piumasagaataasup naammassineqarnissaata tungaanut.

Imm. 4. Politiit imm. 1 aamma 2 tunngavigalugit peqqussuteqarnerat akuersissuteqartarnermut aalajangiisartunut naammagittaalliutigineqarsinnaavoq.

Imm. 5. Naammagittaalliuteqarneq kinguartitsinermik kinguneqarsinnaavoq imaangippat akuersissuteqartarnermut aalajangiisartut allamik aalajangersaasut.

Matulerisut

§ 65. Neriniartarfinni aamma sassaalliteqartarfinni allani inunnik naammattumik amerlassusilinnik matulerisutut nakkutilliisussanik sulisoqassaaq.

Imm. 2. Naalackersuisut maleruaqqusanik aalajangersaasinnaapput matulerisut aamma matulerisussatut suliaqartussat inatsisitigut pisussaaffiliineq tunngavigalugu ilinniartitsisarnissamut tunngasunik.

Nakkutilliineq

§ 66. Naalackersuisut imaluunniit taamatut iliortussatut pisussaaffilerneqartoq inatsisip eqqortinneqarneranik nakkutilliipput.

Imm. 2. Naalackersuisut nakkutilliinerup ingerlanneqarnissaanut tunngasunik maleruaqqusanik aalajangersaasinnaapput.

Imm. 3. Naalackersuisut imaluunniit taamatut iliortussatut pisussaaffilerneqartoq eqqartuussisup aalajangiineranik tunngaveqarnatik kinaassutsiminnik pissusissamisoortumik uppernarsaateqarlutik ininut imaluunniit ininut suliffeqarfinnut atasunut, Inatsisartut Inatsisaannut matumunnga attuumassuteqartinneqartunut ilaasunut, isersinnaapput. Taamaattorli taamatut isersinnaatitaaneq ineqqanut unnuiffissatut attartortinneqarsimasunut atuutinngilaq.

Imigassat aalakoornartortallit pillugit politikki

§ 67. Kalaallit Nunaanni pisortat suliffeqarfiutaat tamarmik peqquneqarput imigassat aalakoornartortallit pillugit politikkimik suliaqaqqullugit.

Imm. 2. Akuersissummik pigisaqartut tamarmik pisussaapput paasititsiniaanernut Naalackersuisunit aallartinneqartunut peqataanissaminnut.

Kapitali 13

Naalackersuisunut allanullu piginnaatitsissutit

§ 68. Naalackersuisut imigassanik aalakoornartortalinnik nioqquteqarsinnaanermut sassaalliteqarsinnaanermullu suliarinninnernut imaluunniit nutarterinernut aammattaq § 18 tungavigalugu atsiortarnernut akiliutissanik aalajangersaasinnaapput. Akiliutissat annertussusissaat akilersinniarneqarnissaalu pillugit Naalackersuisut maleruaqqusanik aalajangersaasinnaapput. Akiliutit Landskarsimut ingerlatinneqassapput.

§ 69. Matuma inatsisip aalajangersagartai allat apeqqutaatinnagit Naalackersuisut imigassanik aalakoornartunik killeqanngitsumik akisussaassuseqanngitsumillu atornerluisoqartillugu nioqquteqarnermut sassaalliteqarnermilu malittarisassiorsinnaapput taamaasillugu innuttaasut imigassanik aalakoornartortalinnik pisinnaanerat killilerlugu unitsilluinnarluguluunniit. Malittarisassat nuna tamaat atuuttussanngortissinnaavaat imaluunniit nunap immikkoortuanut aalajangersimasumut atuuttussanngortillugit.

Imm. 2. Naalackersuisut maleruaqqusanik immikkut ittunik suliaqarsinnaapput suliffinni imigassanik aalakoornartortalinnik atuisinnaanerup killilersorneqarneranik.

Imm. 3. Naalackersuisut aalajangersakkanik aalajangersaasinnaapput sumiiffinni kommuneqarfiit aggornerisa avataanniittuni imigassanik aalakoornartortalinnik nioqquteqarsinnaanermut sassaalliteqarsinnaanermullu akuersissuteqartarnerit arsaarinnissuteqartarnerillu pillugit. Taamatuttaq Naalackersuisut aalajangersakkanik aalajangersaasinnaapput imm. 1-imi taaneqartutut ittunik sumiiffinni kommuneqarfiit aggornerisa avataanniittuni atuuttussanik.

Imm. 4. Naalackersuisut aalajangersakkanik aalajangersaasinnaapput umiarsuarni imigassanik aalakoornartortalinnik tuniniaanermut aamma sassaalliteqarnermut.

Kapitali 14

Aalajangiinerit naammagittaalliutiginerat

Allaffissornikkut misiliinerit

§ 70. Akuersissuteqartarnermut aalajangiisartut imigassanik aalakoornartortalinnik nioqquteqarsinnaanermut sassaalliteqarsinnaanermullu akuersissutinut aamma akuerisaanernut suliassanut tungasuni aalajangersaanernik aalajangiisassapput.

Imm. 2. Akuersissuteqartarnermut aalajangiisartut aalajangersaernerat allakkatigut nalunaarutigineqassaaq.

§ 71. Akuersissuteqartarnermut aalajangiisartut § 71 tunngavigalugu aalajangiinerat Naalackersuisunut naammagittaalliutigineqarsinnaavoq.

Imm. 2. Naammagittaalliut imm. 1 tunngavigalugu akuersissuteqartarnermut aalajangiisartunit tiguneqareersimassaaq aalajangiinerup akuersissummik pigisaqartumut nalunaarutigineqarneranit kingusinnerpaamik sapaatit akunneri sisamat qaangiutsinnagit.

Imm. 3. Akuersissuteqartarnermut aalajangiisartut imm. 1 tunngavigalugu naammagittaalliut tigareerunikku taanna Naalackersuisunut ingerlateqqissavaat suliamut tunngasut ilanngullugit.

Imm. 4. Naalackersuisunut imm. 1 tunngavigalugu naammagittaalliummik tunniussineq kinguartitsinissamut sunniuteqarsinnaanngilaq, Naalackersuisut tamatumunnga immikkut ittumik allamik aalajangiippata.

§ 72. Naalackersuisunit aalajangiinerit aalajangersarneqartut oqartussaasut allaffeqarfiinut allanut ingerlateqqinneqarsinnaanngillat.

Kapitali 15

Pineqaatissiissutissanut il.il. aalajangersakkat

§ 73. Akiliisitsineq pineqaatissiissutaassapput:

- 1) unioqqutitsinerit ukuninnga § 3, imm. 1, § 6, § 7, imm. 1, 2 aamma 5, § 8, imm. 3, § 9, imm. 3, § 11, imm. 1, 2 aamma 3, § 16, imm. 1 aamma 2, § 17, imm. 1 aamma 2, § 18, imm. 2 § 20, § 22, imm. 1, § 37, imm. 1 § 38, § 39, § 40, § 41, imm. 1, 2, 3 aamma 4, § 42, § 43, § 44, § 45, § 46, § 47, § 49, imm. 1, 2, 3 aamma 4, § 50, § 51, § 52, § 53, § 54, § 55 imm. 1 aamma 2, § 57, § 58, imm. 1, 3 aamma 4, § 59, § 62, imm. 1,
- 2) piunasaqaataasunit unioqqutitsinerit uku tunngavigalugit aalajangersarneqartunik § 10, imm. 4, § 16, imm. 3, § 27, imm. 2.
- 3) politiit § 60, inerteqquteqarnerat, aammalu § 63, imm. 1 aamma § 64, imm. 1 tunngavigalugit peqqussuteqarnerannit unioqqutitsineq.

Imm. 2. Inatsisimmi matumani aalajangersakkanut akerliusumik imigassanik aalakoornartortalinnik imertoq, pisisoq imaluunniit imminut pissarsitittoq allanilluunniit pissarsititsisoq pillaammik akiliisinneqassaaq.

Imm. 3. Naalackersuisut piginnaatinneqarput maleruaqqusatigut, inatsit manna tunngavigalugu aalajangersarneqartutigut, maleruaqqusanik aalajangersagaliqqullugit unioqqutitsinernut akiliisitsisoqartarnissaanut tunngasunik aamma arsaarinnissuteqarsinnaanermut aalajangersakkanik makkuninnga unioqqutitsisoqarneratigut.

Imm. 4. Akuersissummik pigisaqartoq taamatuttaaq nioqquteqarnermut imaluunniit sassaalluteqartarnermut suliffimmi akisussaasuusoq, imigassanik aalakoornartortalinnik nioqquteqartarfiusumi imaluunniit sassaalluteqartarfiusartumi, akiliisinneqarluni

pineqaatissinneqarsinnaavoq § 44-mi imm. 1-imik aamma § 49-mi, imm. 1-imik aamma 4-mik unioqqutitsiguni, suliffeqarfimmi sulisoq unioqqutitsisimappat tamatumani apeqqutaatinnagu unioqqutitsineq piaaraluneernikkut imaluunniit mianersuaalliornikkut taakkununga pisuutitsissutaasinnaangikkaluarpalluunniit.

Imm. 5. Imigassat aalakoornartortallit angerlarsimaffinni imigassaliat aamma atortussat aalakoornartortalinnik angerlarsimaffinni imigassaliornissamut nalinginnaasumik atorineqarsinnaasut, aammattaaq nioqqutissiat § 57 imm. 2-mi taaneqartut arsaarinnissutigineqarsinnaapput.

Imm. 6. Inatsisartut Inatsisaanni aalajangerneqarpat pineqaatissinneqarnermi akiliisoqarnissaa, taava akiligassaq pineqaatissiisutaasoq inummut inatsisitigut akisussaasumut akiligassangortinneqassaaq Kalaallit Nunaanni pinerluttulerinermut inatsit tunngavigalugu.

Imm. 7. Akiliisitsinermi akiliutigineqartut imaluunniit arsaarinnissutigineqartut, inatsit manna tunngavigalugu imaluunniit maleruaqqusat inatsit manna tunngavigalugu aalajangersarneqartut, Landskarsimut ingerlatinneqassapput.

Kapitali 16

Atortuulersitsinermit aamma ikaarsaariarnermi aalajangersakkat

§ 74. Inatsisartut Inatsisaat manna atuutilerpoq ulloq 1. juli 2017.

Imm. 2. Inatsisartut Inatsisaata atuutilerneratigut Inatsisartut Inatsisaat nr. 11, 11. november 2000-imeersoq imigassanik aalakoornartortalinnik nioqquteqartarneq sassaallertarnerlu pillugit kingusinnerusuklut Inatsisartut Inatsisaatigut nr. 3-kkut 2001-imeersuklut allanngortinneqartoq atorunnaarsinneqarput.

Imm. 3. Nalunaarutit aamma maleruaqqusaliat allat imigassanik aalakoornartortalinnik nioqquteqartarneq sassaallertarnerlu pillugit Inatsisartut Inatsisaat nr. 11, 11. november 2000-imeersoq aamma Inatsisartut Inatsisaat nr. 3, 2001-imeersoq tungavigalugit aalajangersarneqarsimasut atorunnaarsinneqarnissamik tungaanut atuutissapput.

Imm. 4. Imigassanik aalakoornartortalinnik nioqquteqarsinnaanermut sassaalliteqarsinnaanermullu akuersissutit inatsisip matuma atortuutilerfia sioqqullugu tunniunneqarsimasut atorunnaarnissamik imaluunniit inatsit manna tunngavigalugu atorunnaarsinneqarnissamik tungaanut atuutissapput.

§ 75. Inatsisartut Inatsisaat manna Kalaallit Nunaata illersorneqarnissaa pillugu 27. april 1951-imi Isumaqatigiissutigineqarsimasoq kingusinnerusukkullu allannguuteqartinneqartarsimasoq tunngavigalugu sumiiffinnut sakkutooqarfinnut atuutinngilaq.

Namminersorlutik Oqartussat, ulloq xx. xx 2016

Kim Kielsen